

13 MAR 2000

Mahathir-Pelabuhan

PTP MENJADI PEMANGKIN KEPADA PEMBANGUNAN EKONOMI NEGARA, KATA MAHATHIR

JOHOR BAHRU, 13 Mac (Bernama) -- Perdana Menteri Datuk Seri Dr Mahathir Mohamad hari ini berkata Pelabuhan Tanjung Pelepas (PTP), pelabuhan kedua di Johor, akan menjadi pemangkin kepada pembangunan ekonomi negara khususnya bagi kawasan selatan Johor.

Katanya PTP akan menjadi antara pintu masuk utama perdagangan negara dan hasil daripada perkembangan pesat itu, pelabuhan berkenaan akan turut menggerakkan aktiviti-aktiviti lain yang berkaitan dengan pelabuhan seperti pergudangan dan perkilangan.

"Secara umumnya PTP tidak mempunyai apa-apa yang boleh menghalang pertumbuhannya. Kedudukannya di lokasi strategik dan di pertengahan laluan perkapalan adalah merupakan aset utama yang dapat menarik syarikat-syarikat perkapalan untuk menggunakan pelabuhan ini," kata beliau.

Perdana Menteri berkata demikian ketika merasmikan Pelabuhan Tanjung Pelepas di Gelang Patah, dekat sini, yang bernilai RM2.4 bilion. Yang hadir sama ialah Menteri Besar Datuk Abdul Ghani Othman dan pengerusi PTP Datuk Mohamed Taufik Abdullah.

Dr Mahathir berkata kerajaan komited dalam menentukan kejayaan PTP dan telah membelanjakan lebih RM100 juta untuk menyediakan jalan raya dan lebih RM600 juta bagi pembinaan rel keretapi.

Dr Mahathir berkata dengan kemudahan prasarana yang disediakan, PTP akan mempunyai rangkaian sistem perhubungan dan pengangkutan yang terbaik dan oleh itu pekilang-pekilang tempatan tidak lagi mempunyai alasan untuk tidak menggunakan pelabuhan tempatan khususnya PTP.

Menurutnya kerajaan sentiasa berusaha untuk meningkat dan menggalakkan pembangunan pelabuhan di negara ini dan kerajaan menyedari pelabuhan memainkan peranan penting ke arah meningkatkan ekonomi negara.

Malahan jika dilihat negara-negara maju, sektor pelabuhan menyumbang peratusan yang besar kepada pendapatan negara dan kerajaan telah memberikan galakkan dan insentif tertentu untuk menaikkan lagi sektor pelabuhan.

Bagi PTP, kata Perdana Menteri, kerajaan juga telah memberikan status zon bebas dan dengan itu urusan dalam kawasan pelabuhan adalah bebas daripada cukai dan duti kastam serta beberapa duti lain.

Kerajaan berharap melalui insentif seumpama itu pelabuhan negara khususnya PTP dapat memainkan peranan untuk meningkatkan lagi perdagangan negara.

Pada masa yang sama, kerajaan juga mengharapkan kerjasama semua pihak khususnya pekilang-pekilang tempatan untuk menggunakan sepenuhnya pelabuhan tempatan dan dengan adanya pelabuhan itu, pekilang-pekilang tempatan tidak seharusnya bergantung lagi kepada pelabuhan asing untuk urusan import dan eksport.

Kerajaan bersedia menimbang semua masalah berkaitan bagi tujuan meningkatkan sektor pelabuhan negara, kata Dr Mahathir.

Perdana Menteri berkata beliau percaya kecanggihan infrastruktur dan peralatan moden sahaja tidak menjadikannya kemudahan bertaraf dunia kerana kemudahan pelabuhan moden turut menimbulkan harapan tinggi untuk mendapatkan taraf perkhidmatan yang baik, cekap dan berkesan sama ada daripada pegawai dan kakitangan syarikat yang menguruskan pelabuhan atau agensi-agensi kerajaan.

Dr Mahathir berkata kakitangan PTP mestilah dilatih dengan baik supaya segala peralatan pelabuhan dapat memberi pulangan yang maksimum dan pada masa yang sama agensi-agensi kerajaan yang berurusan secara terus dengan

operasi pelabuhan, perlu terus meningkatkan kualiti perkhidmatan mereka.

Industri perkhidmatan jika diuruskan dengan efisien akan dapat meningkatkan keyakinan pengguna pelabuhan dan seterusnya membantu membentuk kejayaan pelabuhan negara, katanya.

Perdana Menteri menegaskan bahawa sesuatu kejayaan itu tidak akan dicapai secara individu sebaliknya ia adalah satu usaha kolektif. "Kita semua yang hadir pada hari ini mempunyai peranan masing-masing untuk menentukan kejayaan pelabuhan negara termasuk Pelabuhan Tanjung Pelepas."

Dr Mahathir berkata PTP secara langsung dan tidak langsung adalah milik rakyat Malaysia dan rakyatlah yang akan mendapat nikmat dan pendapatan daripadanya.

Katanya pembukaan PTP menandakan satu lagi langkah jangka panjang kerajaan untuk memantapkan sektor pelabuhan negara di samping mencerminkan kejayaan pembangunan Malaysia.

PTP merupakan antara projek infrastruktur terbesar negara dan ia membuktikan kemampuan Malaysia membina pelabuhan bertaraf antarabangsa dengan teknologi futuristik.

Dr Mahathir berkata semasa krisis ekonomi baru-baru ini beberapa projek infrastruktur penting telah ditangguh atau dijadualkan semula pelaksanaannya dan kerajaan hanya meneruskan beberapa projek kritikal yang dapat merangsang semula pemulihan ekonomi negara dan ini termasuk projek pembangunan PTP.

"Ini telah terbukti bahawa walaupun pelabuhan ini dibangunkan di situasi ekonomi yang agak sukar, ia masih dapat dilaksanakan dengan jayanya. Malahan pembangunan pelabuhan ini telah disiapkan tiga bulan lebih awal dari jadual asalnya," kata Dr Mahathir.

Fasa pertama Pelabuhan Tanjung Pelepas merangkumi enam dermaga keseluruhannya sepanjang 2.16km. Bagi keperluan fasa-fasa seterusnya ia akan dibina secara berperingkat mengikut perkembangan dan permintaan pengendalian kontena serantau dan antarabangsa.

Apabila siap sepenuhnya PTP mampu mengendalikan sejumlah 3.8 juta TEUs (Twenty-foot equivalent units) setahun. Pelebaran kawasan berlabuh berhadapan dermaga seluas 600 meter dengan kedalaman air melebihi 15 meter membolehkan PTP mengendalikan kapal-kapal kontena generasi terbaru dengan mudah dan tanpa banyak masalah.

Operasi pelabuhan, termasuk sistem pintu masuk akan digerakkan sepenuhnya oleh sistem teknologi maklumat.

-- BERNAMA

MKO RON